

ISLAMIC
KBP184.9
A27
I75
1921

McGill University Library



3 102 791 842 2

~~MCI~~

~~.A872d~~

INSTITUTE
OF
ISLAMIC
STUDIES

65763 ★

McGILL
UNIVERSITY

عاطف افندی کتبخانه سی

نشریاتندن

عدد

Den-i İslâmda men-i Muskerat

دین اسلامده منع مسکرات

محمدری :

فاتح درسعاملرندن مدرسه الارشاد حکمت تشریح مدرسی اسکابل

محمد عاطف

Atif

مضمرجات — مسکراتک تعریفی و تاربخچه سی ، تحریم خورآیتلری ، حرمت خمره دائر دلائل شرعیه ، خمرک حقیقتی و فقهانک اخلاقی ، عموم مسکراتک حرمتنه دائر احادیث شریفه ، مسکراتک قبحنه عائد دلیل عقلی ، مضریحت اولدیفنه دلیل فنی ، حرمت مسکراتک علت و حکمتی ، مسکراتک منافع و مضاری ، وجوده ، عنله ، اخلاقه ، ناموسه مضرتی ، مضرت اقتصادی سی ، حیات عائله یه ضرری ، اجتماعی ضررلری ، دینی ضررلری ، مسکراتک نفی ایله ضررلرینی مقایسه ، منع مسکرات و ثروت ملیه ، منع مسکرات و قانون ، مسکرات و تصفیة اخلاق ، استعمال مسکراتک توسعنه سبب ، خمرک وسائر مسکراتک احکام شرعیه سی ، مسکراتک بیع شرا و اعمالی ، مسکرات وسائر محرمان ایله تداوی ، مسکرات ایله تداوی یه دائر امریقاد و قوتورلرینک رأیلری ، آفیون ، اسرار ، قوفائین و مورفینک احکامی .



ساتیش محلی : بابزیدده حکاکلرده (۷۷) نومرولی دکان

استانبول — مطبعه عامره

۱۳۴۰

T1957

Din-i Islāmda

دین اسلامده منع مسکرات


محرری :

فایح درس عاملرندن مدرسه الارشاد حکمت تشریح مدرسسی اسکابلی

محمد عاطف

Mehmed

مندرجات — مسکراتک تعریفی و تاریخچه-سی ، تحریم خمر آیتلری ، حرمت خمره دائر دلائل شرعییه ، خمرک حقیقی و فقهانک اخلاقی ، هموم مسکراتک حرمتنه دائر احادیث شریفه ، مسکراتک قبحنه عائد دال دل علی ، مضرحت اولدیغنه دلیل فی ، حرمت مسکراتک علت و حکمتی ، مسکراتک منافع و مضاری ، وجوده ، عنله ، اخلاقه ، ناموسه مضرتی ، مضرت اقتصادی-سی ، حیات عاطلهیه ضرری ، اجتماعی ضررلری ، دخی ضررلری ، مسکرتک نفی ایله ضررلرینی مقایسه ، منع مسکرات و ثروت ملییه ، منع مسکرات وقانون ، مسکرات و تصمیه اخلاق ، استعمال مسکراتک توسمنه - سبب ، خمرک وسائر مسکراتک احکام شرعییه سی ، مسکراتک بیع ثرا و اعمالی ، مسکرات وسائر محرمات ایله تداوی ، مسکرات ایله تداوییه دائر امریقاد و قوتورلرینک رأبلری ، آفیون ، اسرار ، قوفائین و مورفینک احکامی .



صایینس محللی : بایزیدده حکاکلرده (۴۷) نومرولی دکان

استانبول — مطبعه عامره

۱۳۴۰

دين اسلامده منع مسكرات

بسم الله الرحمن الرحيم

الحمد لله الذي نهى عباده عن كل ما يضر وامرهم بكل ما هو النافع
والصلاة والسلام على النبي الذي بين الحرام والحلال على ما وحي اليه الشارع
وعلى آله واصحابه الذين انتهوا عما نهوا وتمسكوا بما امروا على ما هو الواقع .

مسكرات

مسكرات: كرك صلب وكرك . يع مطلقا سر خوشلق ويرن شيلردر .
ازمنه قديمه دنبري مسكرات استعمالی افراد بشریه آراسنده معروف
ایدی . هندده ، چینده ، روماده ، عربستان وبلاد ساثرده مسكرات
استعمال اولوردی . وحتى اوائل اسلامده خمر وسائر مسكرات مباح
ایدی . مسلمانلر ایچرلر و آلوب ساتارلردی .

حضرت فاروق ، معاذ واصحاب كرامدن دها بعضیلری (رضی الله
عنهم) رسول اکرم (صلی الله علیه وسلم) اقتدمزه کیدوب (یارسول
الله خمر عقلی ازاله ، مالی اهلاک ایدیورد . آنک حقنده بزه برفتوی
ویر) دیدیلر .

بونک اوزرینه سورهُ بقره نك [۲۱۹] نبی (يَسْأَلُونَكَ عَنِ الْخَمْرِ

وَالْمَيْمِرِ قُلْ فِيهِمَا إِثْمٌ كَبِيرٌ وَمَنَافِعُ لِلنَّاسِ وَإِثْمُهُمَا أَكْبَرُ مِن

نَفْعِهِمَا = ای محمد سکا خمر ایله قماردن سؤال ایدیورلر . دیکه :
بونلرده بیوک کناه، عظیم ضرر واردر. ناسه بر نوع منافعی اولسه ده
بونلرک مضرتی منفعتندن پک چوق و پک بیوکدر) آیت جلیله سی شرف
نزول ایده رک خمرک مضرتی منفعتندن کیمت و کیفیتجه زیاده اولدینی
بلیغ بر صورتده بیان بیورلمش اولدی. فقط حرمتی تصریح اولمیدیعدن
(ائم کبیر) قول کریمنه نظراً اصحاب کرامدن بعضیلری ایچکی نی ترک
ایدوب ، دیگر بعضیلری ده (و منافع ناماس) قول جلیلینی نظر اعتباره
الهرق ایچمکده دوام ایتشلردی . بر مدت صکره عبدالرحمن بن عوف
حضرتلری اصحاب کرامدن بعضیلرینه ضیافت و یردی . خمر ایچوب
سرخوش اولدیلر . ایچلرندن بریسی امام اولدی . نمازه دوردیلر .
امام اولان ذات (قل یا ایها الکافرون لاعبدوا تعبدون) دیه او قویه جق
ایکن سکرک تاثیریه (قل یا ایها الکافرون اعبدوا تعبدون) طرزنده او قودی .
بووقه اوزرینه سوره نسانک ، ۴۲ ، نجی (لَا تَقْرَبُوا الصَّلَاةَ

وَأَنْتُمْ سُكَارَى حَتَّى تَعْلَمُوا مَا تَقُولُونَ = ای مؤمنلر سز سرخوش
اوله رق نمازه دور میکز . دور مزدن اول سویلدیکزی بیلمدکجه) آیت
جلیله سی نازل اوله رق اوقات صلاتده سکر حرام قلندی . بوتاریخدن اعتباراً
اصحابدن مسکرات استعمال ایدنلر پک آز قالدی . ایچنلرده اکثر یا یاتسو
نمازینی قیلدقدن صکره ایچرلردی .

بوندن بر مدت صکره عثمان بن مالک مهاجریندن سعد بن ابی وقاصی
انصاردن بر جماعتله برابر دعوت ایتدی ضیافتده مسکرات استعمال
ایدوب سرخوش اولدیلر . سکر تاثیراتیه تفایخ ایتدیلر ، اشعار
او قودیله حضرت سعدانصاری هجوہ دائر بر شعر او قودی ، انصاردن

برسی دونهك چكه كميكي ايله سعدك باشنه اوروب ياردي. سعدرضي الله
عنه رسول اكرم (صلى الله عليه وسلم) اقدمزه شكايهت ايتدي .
بيغمبر ذيشان اقدمز حضرتلري (اَللّٰهُمَّ بَيِّنْ لَنَا فِي الْحَمْرِ بَيَانًا شَافِيًا
= ياربي بزه احكام حمرى شافى و قطعى صورتده بيان بيور) ديه دعا
ايتدي .

ايشته بودعا رسالتپناهي اوزرينه سورة مائدهك (۹۳) نحى
[يَا أَيُّهَا الَّذِينَ آمَنُوا إِنَّمَا الْخَمْرُ وَالْمَيْسِرُ وَالْأَنْصَابُ الْأَرْزَامُ خَسْرٌ
مِّنْ عَمَلِ الشَّيْطَانِ فَاجْتَنِبُوهُ لَعَلَّكُمْ تُفْلِحُونَ إِنَّمَا يُرِيدُ الشَّيْطَانُ
أَنْ يُوقِعَ بَيْنَكُمُ الْعَدَاوَةَ وَالْبَغْضَاءَ فِي الْخَمْرِ وَالْمَيْسِرِ وَيُصَدِّ
كُمُ عَنْ ذِكْرِ اللَّهِ وَعَنِ الصَّلَاةِ فَهَلْ أَنتُمْ مُنْتَهُونَ = اى مؤمنلر
خمر ، قمار ، عبادت ايجون منصوب بتلر ، قمار او قلري شيطانك
تسويلات و تزيناتندن حاصل اولان نجس و مردار شيلردر .
ايمدى بونلردن اجتناب ايديكز كه نائل فوز و فلاح اوله سيكز .
شيطان خمر ، قمار ايله سزك آره كرده عداوت و شدتلى خصومت ايقاع
ايتك و سزى ذكر اللهدن و نمازدن اليقويمق ايتره . ايمدى « بونلرده كي
دنيوى و اخروى شرور و مفسد كشف و بيان اولندينى حالده ،
دها اجتناب ايدوب و از كچميه جكميسكز] آيت جليلهسى نازل اوله رق خمر
صورت قطعيده حرام قيلندي .

(فهل انتم منتهون) نظم كريمى نازل اولنجه حضرت فاروق (عقلى
سلب ، مالى اتلاف ايلين خمردن و از كچك و بوكا دائر وارد اولان
يساغى قبول ايتدك] بيوردي . و در حال اصحاب كرام حضراتى

اولرنده بولنان مسكراتى دو كدير ، قابلرينى قيردير ، بردها مسكرات استعمال ايتدير . انس بن مالك حضرتلرى ديوركه : خمر حرام قلنديغى كون اصحابدن ابو عبيدة بن الجراح ، ابوطلحه ، ابى بن كعب ودها بعضلرى ابوطلحه نك اونده شرب خمر ايتك اوزره اجتماع ايتمشلردى . بن سناً اك كوچكلرى اولديغى همچون آنلرك ساقيسى ايدم . اوكون آنلرك ايجدكلرى خمر فضيخ يعنى خورمه دن ياپيلمش شراب ايدى . بر كيمسه نك ندا ايلديكى ايشيدلدى ابوطلحه بكا « چيق باق » ديدى « خانه دن چيقدم برنادينك » **« أَلَا إِنَّ الْحُمْرَ قَدْ حُرِّمَتْ »** بيليكز كه خمر صورت قطعيده حرام قلندى « ديه ندا ايلديكى ايشتم و كوردم . . مدينه سوقاقلرنده بو اعلان شايع اولدى .

ابوطلحه « يا انس شو خمرى دو ك ، كوپى قير ، ديدى « بن ده همان كوپى قيردم ، خمرى دو كدم » بيورمشلردر .

سوره مائده نك بو آيت جليله سيله اوج جهندن خمر ك حرمقى بيان بيورلمقده در .

اولا — « رجس من عمل الشيطان » قول جليلى ايله طرف شارعدن خمره « رجس » يعنى نجس تسميه اولمشدر . بو ايسه لسان شرعه انجق ذاتى اعتباريله حرام و ممنوع اولان شينه اطلاق اولنور .

ثانياً — « فاجتنبوه » قول كريمى ايله خردن اجتناب ايدملك اوزره امر بيورلمشدر . امر ايسه مأمور به اولان شينك لزومى اقتضا ايدر .

ثالثاً — « فهل اتم منتهون » نظم مينتك معناسى « فانتهاوا » خردن واز كچيكز « ديمكدر كه خردن اجتنابك لزومى خصوصسنده امر قطعى در . ايشته بو آيت جليله ايله صورمؤكده و قطعيده خمر ك حرام

قلندینی بیان و تبلیغ بیورمشدر آنک، ایچون رسول ذیشان افندمر
[إِنَّ اللَّهَ حَرَّمَ الْخَمْرَ فَلَا أُمَّتَ فِيهَا] = الله تعالی خمری صورت قطعیده
حرام قلدی آنده شک و شبهه یوقدر [قاموس] بیورمشلردر. بناءً علیه خمر
مفهومی تحتند، داخل اولان هر نوع ایچکینک چوغی، آزی، قطره سی
شرعاً حرام قطعی در.

بخاری شریف شارحی عینی مر حومک تحقیقنه نظراً مکة مکرمه نیک
فتوی یعنی هجرت نبویه نیک سکنزنجی سنه سنده فتحدن اول، دمیاطی نیک
بیاننه کورده ده التنجی سنه هجریه ده خمر حرام قلندمشدر.

خمرک حقیقتی

فقهای کرام میاننده «خمر» اسمنک شامل اولدینی ایچکیلر حقدند
اختلاف اولنمشدر: امام اعظم و امام ابی یوسف (رحمهما الله) حضر اتنه کوره
خمر: اوزوم شیره سندن معمول اولان مسکرات در.

خمر اسمی بونده حقیقت، باشقه لرنده استعمال اولورسه مجازدر.
زمانمزده اوزوم شیره سندن اعمال اولنوبده شراب، شانپانیا،
ماسقیقه، قونیاق، روم نامی ویریلن ایچکیلر نصوص قاطعه قرآنیه
ایله عین و ذاتندن ایچون حرام قیلنمش اولان خمر مفهومنده داخلدر
بناءً علیه قطره لری، ذره لری حرامدر. فضلات خمردن ویا اوزوم
شیره سندن استقطار صورتیله یاپیلوب ده عرقی (راقی) نامی ویریلن ایچکی نیک
دخی چوغی، آزی، قطره سی، ذره سی حرامدر. بونلره کوره:
اوزوم شیره سنک غیری شیلردن معمول اولان مسکرات سائره خمر
مفهومنده داخل بولنمادیغندن اولنلرک حرمتی قیاس ایله ثابتدر.

فقهای مدینه ایله امام محمد، امام مالک، امام شافعی [رحمهم الله] حضر اتنه

کوره : کرک اوزوم شیره سندن و کرکسه باشقه شیلردن اعمال ایدلمش
اولسون چوغنی سکر ویرن هر نوع ایچکی خمردر ، هپسنه خمر اسمی
شاملدره . زیر العاظم فقهای اصحاب کرامدن عبدالله بن عمر «رضی الله عنهما»
نک روایت ایلدیکی بر حدیث شریفده رسول اکرم «صلی الله علیه وسلم»
افدمن بیورمشلردرکه «كُلُّ مُسْكِرٍ خَمْرٌ = سکر ویرن هر ایچکی
خمردر» [احکام القرآن] .

اصحاب کرامدن نعمان بن بشیرک روایت ایلدیکی بر حدیث شریفده
رسول ذیشان افدمن بیورمشلردرکه [اَلْخَمْرُ مِنْ خَمْسَةِ اشْيَاءَ اَلتَّمْرُ
وَالغِنْبُ وَالْحِنْطَةُ وَالشَّعِيرُ وَالْعَسَلُ = خمر ، خورمه ، اوزوم ،
بغدای ، آریه ، بالدن عبارت اولق اوزره بش نوع اشیادن معمول
اولور] [احکام القرآن] .

اشیای مذکوره دن معمول اولان اشربه نک خمر اسمی تحتده داخل
اولدیغی بو حدیث شریفده صراحةً بیان بیورلمقددره . فقط خمرک بوبش
شیدن معمول ، اولان اشربه یه تخصیصی اوزمانلرده بوتلردن یاییلمق
معتاد و معروف اولدیغی ایچوندر یوقسه بشقه لرندن یاییله من دیمک
دکلدر . یاخود اساس اعتباریله کئول بوبش نوعک حاوی بولدیغی
نشاسته و شکر ماده گرینه منحصر اولدیغنه اشارت بیورلمش اولمس محتملدره .
اجله فقهای اصحابدن عبدالله بن عباس (رضی الله عنهما) نک
روایت ایلدیکی بر حدیث شریفده فخر عالم افدمن بیورمشلردرکه
(كُلُّ مُخْمَرٍ خَمْرٌ وَكُلُّ مُسْكِرٍ رَامٌ) = عقلی ستر وازاله ایدن
هر ایچکی خمردر و سکر ویرن هر ایچکی حرامدر] [احکام القرآن]

ام المؤمنین حضرت عائشه (رضی الله عنها) نك رؤیت ایلدیکی بر
حدیث شریفده رسول ذیشان افندمن بیورمشلردرکه [کُلُّ شَرَابٍ

أَسْكَرَ فَهُوَ حَرَامٌ = سر خوشلق ویرن هر ایچکی حرامدر] (مسلم)
افاضل صحابه کرامدن حضرت انس بیورمشلردرکه (کُنْتُ سَاقِي

الْقَوْمِ حَيْثُ حُرِّمَتِ الْخَمْرُ فِي مَنْزِلِ أَبِي طَلْحَةَ وَمَا كَانَتْ خَمْرُنَا

يَوْمَئِذٍ إِلَّا الْفَضِيحَ فَمِنْ سَمِعُوا تَحْرِيمَ الْخَمْرِ أَهْرَاقُوا الْأَوَانِي

وَكَسَرُوهَا وَقَالُوا فَقَدْ سَمِيَ النَّبِيُّ صَلَّى اللَّهُ عَلَيْهِ وَسَلَّمَ هَذِهِ الْأَشْرَبَةُ

خَمْرًا = خمر حرام قلندیفی کون ابو طلحه نك اوندن قومك ساقیسی

ایدم . او کون بزم ایچدی کمز خمر خورمه دن یا یلمش شراب ایدی .

خمرک حرام قیلندیفی ایشیدنجه شرابلی دو کدیله ، قابلینی قیردیله

ونجا کرم افندمن بو اشربه یه خمر تسمیه ایله دیدی دیدیله . (احکام القرآن)

عبدالله بن عمرک روایت ایلدیکی بر حدیث شریفده ده پیغمبر

افندمن بیورمشلردرکه (کُلُّ مُسْكَرٍ خَمْرٌ وَكُلُّ خَمْرٍ حَرَامٌ = سکر

ویرن هر ایچکی خمردر وهر خمر حرامدر] (مسلم) .

کتب سته اعجابندن امام ترمزی ، ابو داود ، ابن ماجه حضرت انك

تخریج ایلدیکلری بر حدیث شریفده رسول ذیشان افندمن حضرت تلی

بیورمشلردرکه (مَا أَسْكَرَ كَثْرُهُ فَقَلِيلُهُ حَرَامٌ = چوغی سکر

ویرن ایچکینك آز مقداری ده حرامدر .) [مشکاه المصابیح]

بروجه بالا ذکر اولنان احادیث شریفه ایله اقوال صحابه دن کرک

لغته و کرکسه لسان شرعه سائر اشربه نك خمر مفهومی تحتده داخل اولدینی تحقق ایتش اولور .

برده سائر اشربه خمر مفهومنده داخل اولسه یدی خمرک حرام قلندینی کون صحابه کرام حضراتی خورمه شیره سندن معمول اولان شرابلرنی دوکمز، قابلرنی قیرماز و مسکرات ایچمکدن و ازکمز لرایدی . بناء علیه بیان اولنان احادیث شریفه و اقوال صحابه ایله چوغی سکر و یرن هر ایچکینک خمر اولدینی و خمر مفهومنده مندرج بولندینی ثابت اولمش اولور .

بو ثابت اولنجه چوغی سکر و یرن هر نوع ایچکی نك چوغی و آزی، (انما الخمر الایه) آیت جلیله سببیه بیان بیوردیان تحریم خمر حکمی تحتده داخل اولور . بناء علیه فطره لری، ذره لری حرامدر . مسکرات دیناً حرام قلندینی کبی عقلاً قیسح ، فآده مضردر .

عقلاً قیسحدر . چونکه نفوس بشریه نك درکه همیشه تردی و سقوطنه، افراد بشره بخش اولنان نعم الهیه نك ال قیمتداری بولنان عقلک ازاله و افسادینه ، وجود بشرک علل و امراض کثیره یه دوچار اولسنه سبب اولدقدن بشقه عائله و هیئت اجتماعیه آره سنده بک چوق و بک مهم مضر تلرک حصوانه باعث اولدینی ایچون عقول سلیمه بالعموم مسکراتک قیسح و فالغنه صورت قطعیه ده حکم ایتمکده در .

فناً مضردر زیرا: ارباب اختصاصدن اولان کیمیا کر لر طرفدن واقع اولان تحلیل کیمیوی ایله ثابت اولدیغنه نظراً: حام اوزوم شیراسی کلی مقدارده (شکر) ماده سنی حاویدر . بو ماده کندی حالتده ایکن وجود بشره بک نافعدر . تأثیرات خارجیه ایله اسپرتویه تحویل ایدنجه وجوده و عقله مضررت کلیه می دو قانیر .

آرپه ، بغدادی کبی حبوبات ده کلی مقدارده (نشاسته) ماده سنی
محتویدر . بوماده حال اصلیسنی محافظه ایتدکجه وجودبشرك مابه القوامی
ایکن تأثیرات خارجیه ایله اسپرتویه تحول ایدنجه سمدار بر ماده اولور .
اساساً بتون مسکرات اسپرتو دنیلن زهرناک بر ماده نی حاویدر .
خمر یعنی شراب مایه سنده یوزده (۵-۱۰-۱۸) نسبتنده ، راقیده یوزده
(۳۵-۴۲-۴۵) درجه ده ، قونیا قیده یوزده (۳۵-۴۲-۴۵)
نسبتنده . کئول یعنی اسپرتو دنیلن ماده سمیه واردر .

هر نوع مسکرات حاوی اولدینی اسپرتونک مقدارینه کوره وجود
بشره ایقاع ضرردن خالی قالماس . بناء علیه ماده مذکور نك عقل
ووجود بشره مضرت کلیه سی بولاندینی فنا و تجربه نبوت بولمش
حقائقنددر . آنک ایچون بالعموم مسکرات فنا مضر صحتدر .

شوحالده استعمالیله بشرك مادی ، معنوی ، فردی ، اجتماعی
صورتلر ایله متضرر اولماسی مجزوم بولاندینی ایچون دین جلیل اسلام
بیک اوچیوز کسور سنه اول علی العموم مسکرانی حرام قیلارق بی
بشری ماحی انسانیت اولان بوسم قاتلک و بویوک دشمنک مضر تندن
قورومشدر . فقط بهیمیه انهماک ایتمش اولان اکثر افراد بشریه
عظیم بر لطف ربانی اولان بونعمت جلیله صمدانیه دن مستفید اولمقدن
محروم قالمشدر و قالیورلر .

مسکر تک حرمتنده علت و حکمت

خمرک حرمتی عین و ذاتندن ایچونددر . مسکرات سائر نك حرمتنه
علت ایسه سکر درر . بناء علیه مسکر اولان هر نوع ایچکی حرامدر .
بونده اعلا خلاف یوقدر .

حکمت و مصلحت شرعیہ سنہ کلنجہ : خالق تعالیٰ حضرت تیری
 بر لطف مخصوص اولق اوزرہ ای بی قنادن ، منفعتی مضرتدن تمیز
 و تفریقہ باعث اولوب دین و دنیا نك قطبی مثابه سنده بولنان عقل و ذکا
 احسان بیورہ رق بشری سائر بہائم دن ممتاز قیلمشدر . علی العموم افراد
 بشریہ نائل اولدقلری نعم الہیہ نك الك کزیدہ لرندن اولان عقلک
 مقتضاسی اوزرہ حرکت ایدہ رک طریق حقہ اہتدالری لازم کلیرکن
 وادی جہالته صاپہ رق درکۂ بہیمیتہ تردی و سقوط ، فردی و اجتماعی
 ضلالت و شقاوتہ دوچار اولوب قالمشدر . دیگر طرفدن قوللرینہ
 عظیم بر لطف صمدانی دہا اولق اوزرہ ابنای بشری ظلمات جہل
 و شقاوتدن تخلیص ایلہ دنیوی و اخروی سلامت و سعادتہ ایصال
 ایدہ جک شہرہ مستقیمی ، دین جلیل اسلامی اعصار عدیدہ دہ انبیای
 عظام و ساطتیلہ تبلیغ و انزال ایتمش و بوضورتہ شان ربوبیت و عظمت
 الوہیتہ لایق اولان الطاف صمدانیہ سنی اکمال بیورہ شد . انزال
 بیوریلن دین جلیل اسلام ایسہ ذوی العقولی کندی اختیارلریلہ نظام
 معاش و نجات معادہ دائرہ بالعموم امور خیریہ یہ سوق ایدر [۱] . آنک

[۱] (ان الذین عند اللہ الاسلام) نظم جلیل ایلہ بیان بیوریلن دین
 حق و دین اسلام بومعناہ در . دین اسلام احکام اعتقادیہ و وجدانیہ ایلہ احکام
 عملیہ و مادیہ بی جامعدر . دین اسلامک منافع و مہالیندن مستفید اولق آنجق
 احکام مادیہ و معنویہ سنک ، وجیلہ عمل ایتمکہ موقوفدر . دینک قواعدینی
 بالکمز کتب و اوراقدہ حفظ ایتمک ہیچ بر فائدہ تأمین ایدہ میہ جکی کبی آنک
 دنیا و آخرت ایشلرینہ عائد احکام مادیہ سنک مقتضاسی اوزرہ اعصاب و عضلاتی
 حرکت ایتدیرمدکجہ ، احکام عملیہ سنہ تمام آتسک ایتدکجہ دہ بالکمز اعتقاد ایلہ ،
 مجرد امور وجدانیہ دن اولان اصول دینیہ یہ ربط قلب ایلہ دیندن مطلوب
 اولان فوائد مادیہ و معنویہ حصول پذیر اولماز . عملیاتہ دنیا ایشلرینہ متعلق
 اولان احکام شرعیہ اجمالا شوقلردر : وجوب ، ندب ، اباحہ ، حرمت ، کراہت .

ایچون دنیا و آخرتده بشرک تأمین سلامت و کافل سعادتنی اولان بالعموم امور نافعہ ایله امر ایدوب کافه امور مضره دن نهی و منع ایتمشدر .

اجل نعم الہیہدن اولان وجود و عقل بشرک مقدر اولان اجل معلومه قدر دوام و بقاسی ، مهالك و مفاسدن مصونیتی اوامر الہیہ مقتضیاتندن بولندیغی ایچون افراد بشریہنک عقلورینی ازاله و افساد ، وجودلرینی محو و خراب ایلین هر نوع مسکرات ایله سائر مضر شیلر حرام قلمشدر .

شوحالده مسکراتک حرمتنده کی حکمت شرعیہ وجود و عقول بشری آنک مضرت و مفسدتندن حفظ و صیانتدر .

افعال عباددن هیچ بر فعل یوقدر که بوبش احکام دینیہدن برینه اوغرامیوب آندن خارج قالمش اواسون . هر فعل بیهه حال بوندن برینه اوغرایه جقدر . زیرا آندن خارج قالمق امکان واجتمالی یوقدر . بناءً علیہ دن مبین اسلام امور آخرتله دنیا ایشلرینه دائر کافه احکامی محویدر اساساً دین اسلام بو ایکی نوع احکامدن مر کبدر . ارباب ضالان بضمیلرینک زعم ایلدکلری وجهله خرستیان دینی کی یالکز اعتقادات و امور وجدانیہدن عبارت دکدر .

شوحالده بر کیسه مسلمان اولق ایچون هم آخرت وهم دنیا یه عائد اولان اصول اسلامیہ و احکام قطعیه دینیہنک جمله سنی قبول و تصدیق ایتک لازم و واجبدر . بونلرک هیسنی و یا بعضی سنی رد و انکار ایتک و یا انکاره دلالت ایلین بر فعلده بولتمق ارتداد ، ارتجاع ، حدود و دائره اسلامیتدن خروجدر . رسول زیشان (صلی الله علیه وسلم) اوندنک ارتحالیه زمان وحی منقطع اولدقدنصکره نصوحی قرآنیہ و احادیث نبویہ ایله ثابت اولان احکام منصوصه نک مقتضاسی اوزره عمل ایتمیانلر و آفری رد و انکار ایدنلر اولور سه ده آفرلردن برینی تبدیل ، تغییر النفا و نسخ ایتک ایچون افراد بشر به دن هیچ بر فرد و هیچ بر هیئت حائز صلاحیت دکدر . زیرا احکام دینیہدن بر حکمی نسخ و النفا آجق واضح شریعت اولان شارع اعظم حضرت لرینه عائد بر حقدر . افراد بشر دن هیچ بر فردده بویله بر حق و صلاحیت یوقدر و اولاماز .

بناءً عايمه افراد بشريه دن ولور فردك وجود و عقلنه مضرتي دو قونان مسكرات هره مقدار اولورسه اولسون حكمت حرمت تحقق ايلديكي ايجون شرطا حرام و ممنوعدر .

مسكراتك منافع و مضاري

مسكرات : دنيوي و ديني ، فردي و اجتماعي بك چوق و بك مهلك ضررلره باعثدر . واقعا بعض منافي وار ايسهده اساساً كميت و كيفيت اعتباريله بك آز اولقله برابر سريع الزوال اولديغندن ايضاع ايلديكي ضررلرينه نسبتله هيچ مثابهسنده قالير .
آنك ايجون اول امرده مسكراتك فائده لريله ضررلريني بيان ابدوب بكد بكر لريله مقايسه ايتك ايترم .

مسكراتك منافعي

(وَمَنْفَعُ لِلنَّاسِ = ناس ايجون منافعده واردر) نظم جليلي ايله بيان بيورلديني وجه اوزره ناس ايجون مسكراتدن حاصل اولان منافع ظاهريه : هضم طعامه مدار اولمق ، وجوده سمن و يرمك ، اعضاي بدننه حرارت حصوله كتيرمك ، يوزه قيرميزليق و يرمك ، كافة اعضاي بدنيه بي انتباهه كتيرمك و بونك نتيجه ضروريه سي اولمق اوزرهده انساني بهيمي اذواقه ، جسماني لذائذه مستغرق قيلمق كبي سريع الزوال شيلردن عبارتدر .
ايشته آنجق بو اذواق بهيميه ايله استلذاذ ايتك مقصديه ناس مسكرات استعمالنه انهماك ايدييورلر . شهوتي اويانديران فجع كاذبنه

آلدانهرق اذهان عامه آنی منفعتدار برشی تلقی ایدپیور . فاسک بو
اعتقاد و تلقیبری اعتباریله مسکراتک نفع کاذبندن قرآن کریمده (منافع)
لفظیله تعبیر بیورلمش ایسهده سمادت بشریهی اخلال ایلدیکی ایچون
بونده نفع حقیقی یوقدر .

سوزلری شایان وثوق و اعتماد اولان اطبانک بیانلرینه کوره
مسکراتک محتوی اولدینی اسپرتو مادهسی معدیه داخل اولنجه ایلک
وظیفهسی سریعاً طمارلره کچمکدرکه بونک تاثیر سمیسيله فان اعضای
بدنه یاییلیر . هر عضو غیر طبعی اولهرق انتباهه کلیر ، وظیفهسنی کمال
سرعتله ایفا ایدر . بونک نتیجهسی اولمق اوزره ذهنده کشایش ،
کوزلرده رونق ، وجودده زندهک ، معدده اشتها وهضمه حاضرلق ،
اعضاده قوت ، فسدده اذواق بهیمیه و لذاند جسمانیه حاصل اولور .
ایشته مسکرات استعمال ایدنلرک شخصلرینه عاند منافع بونلردن بشقه
برشی دکلدر . باغچیلرک اوزوم ، فابریقه جیلرایله میخانه جیلرک مسکرات
صانهرق ، حکومتک رسوم آلهرقا کتساب ثروت ایتلمریده مسکراتک
منافی جمله سندن عد اولنه بیلیر .

مسکراتک ضرولری

(ایشم کپیئر = خمرایله قمارده عظیم کناه ، بیوک مضرت واردر)
نظم کریمی ایله بیان بیورلدینی وجه اوزره وجوده ، عقله ، اخلاق
وناموسه ، اقتصاده ، حیات عائله ، حیات اجتماعیه و دینه عاند اولمق
اوزره مسکراتک پک عظیم و پک چوق مضرت و مفسدتی واردر .
وجود و عقله مضرتی واردر . چونکه معدیه واصل اولان اسپرتو

ماده سبک اک سریع واک مدهش تأثیراتی قوای عقیایه ایله حس و حراب مرکز لرنده حاصل اولور. بدایتده کافه اعضا کتولک تأثیرات سمیه سیله ابتباهه کلیرسه ده آز زمان صکره عکس العمل ظهور ایدرک بتون اعضا و قوای بدنیه نك فعالیتی تناقص ایدر؛ وجودده درمانسزلق، عضاده یورغونلق، دماغده، سکیرلرده، حجیرات عضویه ده اویوشوقلق حاصل اولور. وظائف مخصوصه لرینی لایقیله ایفا ایدر مزلر. کتولک تأثیریه دماغ بوزولور، ذکا و قوه حافظه آزالیر؛ امراض عقلیه حصوله کلیر، معده و باغرساقلرک وظیفه لری معطل اولور. قوه هاضمه محو و خراب اولور. معده خسته لقلری ظهور ایدر. کتولک تأثیریه اک اول قره جگر متأثر اولور. طبیعتی ده کیشیر. (تشمع کبد) دنیلن خسته افه، قوم و نقریس یعنی قوننج خسته لقلری حاصل اولور. کتول عصب بصری یه ده تأثیر ایدر، ضعف بصره، عمی یه سبب اولور. الحاصل حاذق و صلاحیتدار دو قوتورلرک بیان ایلدکلری وجهله مسکرات حسی ابطال ایدر، (امراض عصبیه و عقلیه)، (ذات الرئه)، (تشمع کبد)، (هذیان مرتعش)، (ورم) کبی یک چوق مهلك خسته لقلرک حصوانه باعث اولور. آرتق بو صورتله سعادت بشریه نك اک قیمتداری اولان صحت بدنی اخلال و عقلی ابطال ایتش اولور. اخلاق و ناموسه مضرتی واردر. چونکه: خالق تعالی حضرتلری حکمت باهره سیله بشره ایکی نوع قوت بخش بیورمشدر: بری قوه مالکیت، دیکری قوه بهیمیتدر. قوه مالکیت انسانی فضائل عالییه، قوه بهیمیت ایسه موجب تردی اولان رذائل و هوسات نفسانییه جذب و جلب ایدر.

فضائل عالیہ ایہ متصف بولنا تلو امراض روحانیہ دن سالم اولد قلمری ایچون بشریتہ و صحت بدنہ مضر اوله جق افعال و حرکات دن وارسته اولور لر. مساوی و رذائل اخلاق ایله اتصاف ای دن لر ایله امراض روحانیہ ایله معلول بولند قلمری ایچون مضر صحیح و ماحی بشریت اوله جق بیکلرجه افعال و حرکاتک مصدری اولور لر.

حالبوکه افراد بشره بی اعمال غیر مناسبه و افعال قبیحیه اقدام دن منع ایده رک کالات عالیہ یه سوق ایلین انجق عقل و ذکا لریدره. مسکرات تأثیر یله سرخوشلق حصوله کلوب ده عقل زائل اولنجه قوه غضبیہ ایله قوه شهویه عقلک مراقبه و اداره سندن قور توله رق سربست قالیر. بو فرصتدن بالا تفاده قوه همیمیه و هوسات نفسانیه نک انکشافه خادم اولمق اوزره انسانی هر دورلو مساوی و فنا لقلرک ارتکابنه سوق ایده رک بیکلرجه وقوعاتک صدورینه سبب اولور که بونک امثال عدیده سی (مع الاسف) هر کون مشاهده اولنمقده در.

شو حالده دیمک اولیور که مسکرات عقل و محاکمینی ابطال و ازاله ایله قالغه، اخلاق سزلفه، تربیه سزلك و ناموس سزلفه مده رتده جرأت و یردیکندن بیکلرجه فلاکتک ظهورینه باعث اولیور.

ایشته بونک ایچوندر که: رسول معظم [صلی الله علیه وسلم] اقدم مسکراته (ام الفواحش، ام الحباثت، جماع الاثم) عنوانلری ایله تماماً لایق اولدینی وصفی و یرمش، سائر انبای بشر منافعتدن بحث ایله تممیم و انتشارینه چالیشوب دورور کن نبی محترم و [صلی الله علیه وسلم] اقدم اوسم قاتلک منبع رزات و مصدر ملعت اولدیفنی و تمامیله صاقینلما دجه آنک مضر سندن قور توالش امکان بولنمدیفنی عموم بشره اعلان و تبلیغ بیورمش و او زماندن اعتباراً مسکراتی صورت قطعیه ده حرام قلوب منع ایتمشد.

بعض حکما و اطبا تجربه نتیجہ سی اولق اوزره مسکراتک
ضرر لرندن بحث ایتشلر سده رسول اکرم افندمنز ایله امتینک علما
عقلا سدن بنقه فراد بشردن هیچ کیمسه ظهور ایدوبده آنک
تخریبکا ضرر لرندن عموم بنهای بشری قورنار مغه چایشما مشدر.
آنجق تجربه تکاملی، فنک ترقیاتی الهاماتندن اولق اوزره دها
بر قاچ سنه اول آمریکا ایلیز کندی مملکتلی خلقی بونک مضر تندن
تخلیص ایتک اوزره قانونلر وضع ایدهرک مسکراتی منع ایتشلردر.
اقتصاداً مضر تی وارددر: چونکه هر انسان حلال و مشروع
صورتده مال قزاقمله مکلف اولدیگی کبی صرفنده اقتصاده رعایت
ایتمکده مکلف و مجبوردر. بناء عایه مالک محل صرفی معقول و مشروع
اولق لازم و واجبدر. شو حالده شرعاً حرام، عقلاً مذموم اولان
شیلره مال صرف ایتک اسراف و حرامدر. مسکراته صرف ایدیلن
مالده بو جمله دندر. باخصوص چولوغنک، چوجغنک نفقه سندن
کهرک مسکراته صرف ایتک قدر عظیم جنایت، بیوک کناه تصور
اولدماز.

مسکراتک اقتصادی ضرر لری بو قدرله قالماز، اکثریت اعتباریله
قما توآ ولندکن صکره اذواق هیمیه و هوسات نف انیه اجرا ایدمک
اوزره فحشخه لره و یاخود قومار محلا ینه کیدیلیر که ایشته مسکراتک
اک تخریبکار ضرر لری بوندن صکره باشلار. چشید، چشید جنجه
وجنایتلر ارتکاب اولنور. بو اوغورده ملیونلرجه ثروت استهلاک
ایدیلیر. بو یوزدن بیکلرجه طائله لر محو و پریشان اولور.
حبات عائله یه مضر تی وارددر. چونکه: مسکرات استعمالیله هوسات
ففسانیه سنه انهماک ایتمش اولان کیمسه لر حقوق عائله یی حقیله ایفاء

چولوغنىك، چوجغنىك احتياجنى تايمين ايده مزلر، بونلرك سفالته سبب اولورلر، بو يوزدن عائله سيله آرده سى بوزولور، كچيمسزلك باش كوسترر، رابطه زوجيه كوشهر، كونك برنده افتراق حصوله كلير، حيات عائله تماما پریشان اولور.

كئولدن حاصل اولان مضر تلىر يالكىز استعمال ايدنك شخصنه منحصر قالماز. بويله ابويندن تولد ايلين چوجقلره ده سرايت ايدر. چوجق بو يوزدن ابويندن ارثى بعض خسته لقلره دوچار اولور. وجودى ضعيف، معلول، اخلاقي بوزوق اوله رقى يتيشير، اكثر يا عياش ابويندن عياش لغه مستعد يعنى آرزوى فطري سى مسكرات استعمالنه متمايل اولاد يتيشير. بو استعداد وبوقابليتده يتيشن چوجقلر قولايقله مسكراته آليشيره، سفاهتخانه لره كيدر، آناسنى، باباسنى ازعاج ايدر، أونده، بارقنده نه وارسه هپسنى صاتوب بو اوغورده مسرفانه صرف ايدر، عاقبت سفيل و پریشان اولور. بوكي وقوعات مؤسفه نك امثال عديده سته هر زمان، هر مملكتده تصادف ايدلمكده در.

اجتماعى ضررلى

مسكراتك حيات اجتماعيه بشريه يه بك مدهش ضررلى واردور. چونكه: (إِنَّمَا يُرِيدُ الشَّيْطَانُ أَنْ يُوقِعَ بَيْنَكُمُ الْعَدَاوَةَ وَالْبَغْضَاءَ فِي أَحْمَرٍ وَالْمَيْسِرِ = شيطان خمر و قمار ايله آره كزده عداوت و شدتلى خصومت ايقاع ايتك ايستر.)

نظم جليانده بيان بيوردىغى وجه اوزره مسكرات استعماليله حصوله كلن سر خوشلق انسانلرك بغض و عداوت طمارلرني تهسيج

وتحریرك ایدہ رك بین الناس غوغا، كورولتی، سب و شتم، جنایت، جنجہ،
افعال قبیحہ، اعمال منہیہ، احوال مذمومہ نك وقوعه كلیشندہ اك مدہش
عوامل مؤثرہ دن اولدینی ایچون مصالح عامہ بی اخلال و مضرت عمومیہ بی
استلزام ایدر. آنك ایچون عیاشلرك عالم انسانیتہ فائده لرندن زیاده
ضرر لری دو قانیر.

آزوپاده طوتیلان ایستاتسیتیقلره نظراً هر کون وقوعه کلمکده
اولان وقایع جنائیہ نك یوزده (۷۰ - ۹۰) نسبتندہ عیاشین طرفندن
ایقاع ایدلمکده اولدینی آ کلاشلیمشدر.

استانبولده حبسخانه عمومی مدیریتی طرفندن ۱۳۳۹ سنه سنندہ
طوتیلان ایستاتسیتیقه نظراً سنه مذکورہ طرفندہ حبسخانه عمومی به
داخل اولان محکومینك مقداری (۲۵۷۵) اولوب بونلردن (۱۱۲۵) ی
یعنی همان یاریسی یومی وسطی اوله رق (۱۰۰) درهم راقی ایچنلردر.
دیملک اولیورکه هر کون هتک عرض، جرح، قتل و سرقت کبی
جرائمی ایقاع ایدنلردن اکثریسنك سرخوش اولدق لری آ کلاشلیمقده در.
ملکیتمزده مسکرات یوزندن ایقاع اولنان مضرتلره کلهجه بعض
سفاها ایله آوروپالیر، خرستیانلر ملکیتمزده شهرلره، کویلره صوقوله رق
مسلمانلری آولامق ایچون منبع سفالت، مصدر رزالت اولان میخانه
وکارخانه لر آچیورلر؛ مدنیت کسوه سی آلتندہ کویا مدنیتك لازم غیر
مفارق ایتمش کبی وجوده کتیردکلری بویله مغل فضیلت، ماحی بشریت
سفیل مؤسسہ لر واسطه سیمله بر طرفندن سکرک تحریک شهوت و اعطای
سماحت ایتمی خاصه سنندن بالاستفاده اهالی اسلامیه بی صویورلر،
ثروتلرینی آلیورلر؛ دیگر طرفندن ده اک زهرلی و تخریبکار مسکرات
اعمال و فروخت ایدہ رك مسلمانلرك وجودلرینی احما و عقل و ذکالرینی
ابطال ایدیورلر.

حکومات سالفه ایسه دین و ملت نامنه عهده لرینه آلد قلری تکالیف شرعیه ووظائف ملیه ایله غیر قابل تألیف اولدیغنی درخاطر ایتمه رک میخانہ وکارخانہ جیلره مساعده ایدوب ملت وخلق دشمنی اولان بو سیئاتک اهالی اسلامیه آره سننده تعمیم و توسعنه مظاهرت ایدیورلردی . حالبوکه تعهد ایلدکلی وظائفی ایفا ایچون آمریقالیلردن باری عبرت آلملری لازم کلیرکن بو جهتی خاطر لرندن بیله کچیرمیورلردی .

تشکیلات اساسیه قانونی موجبجه دیانت جلیله اسلامیه ایله لوازمی درعهده ایتمش اولان حکومت جمهوریه من ایسه نه آوروپانک بشریتی تخریب ، فضیلت اخلاقیه یی احما ایلین مدنیت سفیهانه لرینه ، نه ده سفیه و شهوتپرست برطاقم اسافلک تمایلات لعینانه لرینه اصلا التفات ایتمه رک تعهد ایلدیکی وظیفه دینییه و ملیه سنی کمال عزم و متانتله ایفا و تطبیق ایتمک اوزره مسکراتی منع ایدوب جهاد اصغرده جهانه وله و حیرت و یرن مظفریت عظیمه سندن صکره بتون مسلمانلری مستغرق سرور و مدیون شکران قیله حق بر جهاد اکبره کیریشمشدرکه بوکبی بالعموم مجاهدات دیندارانه لرنده موفقیتنی کمال خلوصله جناب حقندن دیله ررز .

(مسکراتک دینی ضررلری)

مسکرات دیا تجمده پک چوق ضررلری مستلزمدر . چونکه

(وَيُضِدُّكُمْ عَنْ ذِكْرِ اللَّهِ وَعَنِ الصَّلَاةِ = خمر و قمار سببیه)

شیطان منزی ذکر اللهدن و نمازدن آلیقویمق ایستر)

نظم میننده بیان بیورلدیغنی وجه اوزره استعمال مسکرات انسانی ذوق بهیمییه مستغرق قیلمق سببیه ذکر اللهدن ، نمازدن ، سائر وظائف

دینہ دن آلیقویمق، دیناً منہی اولان افعال و اعمال ارتکابنہ جرأت و یرمک، اعتقادجہ و هن عروضنہ سبب اولمق، امور دینہ دہ اہتمامسزلق حصولہ کتیرمک کبی موجب خمیران احوالہ باعث اولور .

(مسکراتک نفی ایلہ ضررینی مقایسہ)

(وَائْتُمُّهُمَا الْاَلْبُرُّ مِنْ نَفْعِهِمَا = خمر ایلہ قمارک مضرتی نقصدن پک چوق و پک بیو کدر) .

نظم جایی ایلہ بیان بیوردینی و جہلہ نفی ایلہ ضرری مقایسہ ایلدینجہ کورولور کہ مسکراتک کمیت و کیفیت اعتباریلہ مضرتی منفعتدن پک چوق و پک بیو کدر: پک چوقدر . چونکہ فقینک ساحہ سی بعض فردلرہ منحصر قالدینی حالده مضرتی فردلرہ، عائله لرہ، ہیئت اجتماعیلہ، دینہ عام و شامل اولور .

پک بیو کدر . چونکہ آندہ کوریلن نفع سریع الزوال اولدیندن ثابت بر اثر برآمدینی حالده مضرتی فردلرہ، عائله لرہ، ہیئت اجتماعیلہ دہ باقی و واسع اثرلر، تلافیسی غیر قابل عظیم رخنہ لر وجودہ کتیرمکدر . نانیاً — مسکراتدن کوریلن منافع ظاہریہ آرزمان صکرہ بر نوع مضرتہ تحول و یا بر قسم مفسدته باعث اولدیندن سعادت بشریہ یی استهداف ایلین منافع حقیقیہ اولمادینی آکلا شیلیر . چونکہ : ایلک اوکجہ اعضای بدنہ ییہ و یرمش اولدینی انتباء، سرور و نشئه اسپرتونک دماغی اورسہ له مسندن، طہارلری شیشیرمه سندن حاصل بر نوع اضطراب نتیجہ سی اولدیندن بر آرز صکرہ شدید بر یورغونلق و او یوشوقلغہ تحول، یأس و تأثرہ تبدیل ایدر .

استعمال مسكرات ايله وجودده حصوله كلن حرارت ايسه :
اسپرتونك معده دن بدنه ياييله رق دامارلوي كنيشله تمسيله حاصل اولان
بوشلني طولدورمق ايجون داخل بدنن سطح بدنه طوغري فضله
مقدارده حرارتي حامل قان هجوم ايدر . بونك نتيجاسي اولمق اوزره
بدنه حرارت حاصل اولور . يوزده كي قيرميزيلىق ده بوندن نشأت ايدر .
ديك اولور كه بدنه كي حرارت ، يوزده كي قيرميزيلىق قانك
عجوبيله حاصل اولور . يوقسه اسپرتونك بدنه حرارتي آرتيرمسي ،
قاني چوغالتمسي ايله دكل . آنك ايجوندر كه آرزمان صكره قان حال
طبيعيسنه عودت ايدنجه وجودك ايجندن بر اوشومه وتيره مه كله رك
اولجه غير طبيعي اوله رق واقع اولان حرارتك مضر تي بالفعل مشاهده
اولور .

هضم طعامه مدار اولمسنه كلنجه : اسپرتونك بتون اعضاي بدنيه
يرمشن اولديني انتباهك نتيجه سي اولمق اوزره ايلك او كجه معده ده
هضمه حاضرلق واشتها حاصل اولور سه ده فعل هضمي اجرا ايدن
مايعاتي بولاندير مق ، جوهر نافع سفي چو كرتك ، معده وباغصا قلك
ايجروسنده بولنان اينجه زارلوي تخريب ايتك صورتلريه بالاخره
فعل هضمي تصعيب ايدر ، بوندن طولايي اغديه معده وباغصا قلك
تراكم ايدوب قالير ، مضر سحت تعفن حاصل اولور . بر طاقم خسته لقلره
سبب اولور .

وجودي سميرتمسنه ومقوي اولمسنه كلنجه : مسكراتك سميرتمسي
وشيشمانلق ويرمسي حقيقي دكل ظاهر ايدر . زيرا مسكرات استعمال
ايدنلرده عناصر بدنيه تغير ايدر ، جوهر عضلي ضايع اولور . آنلك
يرينه فائده سي اولميان ياغ تشكل ايدر ، بوسيله وجودده شيشمانلق

کورولیورسده ضایع اولان جوهر عضلی نسبتنده بدن قوتی ضایع
ایتمش اولور . بناءً علیه مسکرات حقیقی شیشمانلق وقوت ویرمز
بالعکس قوای حیاتیه نك آزمسنه بادی اولور . واقعا مواد مغذیه پی
احتوا ایلمسی حسبیلله شرابك مقوی اولمسی لازم کلیرسه ده حاوی اولدینی
کشول ماده سی مواد مذ کوره پی معطل قیلدینی ایچون مقویت خاصه سی
ضایع ایتمش اولور .

منع مسکراتك بانغیبلغه و بانغیبلر ، فابریقه جیلر ، میخانه جیلر ایله
حکومتلرک مسکرات یوزندن اکتساب ایتدکلری ثروته ضرری
اولور ، حکومتلر مسکراتی منع ایده جك قانونلر قبول ایتدکلری
تقدیرده هر سنه میلیونلرجه پاره زیان ایدرلر دینلره جواب اولق
اوزره دبرزکه : اولاً — حکومتلرک تأسسندن مقصد و غایه جلب
اموال و ادخار ثروت دکل ، مصالح ناسی حفظ و حراست و ملتک
باعث سعادت پی اوله جق وظائف اجتماعیه و سیاسییه پی ایفا ایتمکدر .
بناءً علیه شو ویابونک تجارت یاممسی و اکتساب ثروت ایلمسی ایچون
مصالح ناسی افساد و سعادت ملق اخلال ایدن مسکراته مساعدده ایتمک
حکومتلرک مقصد تأسسلرنده کی حکمتله اصلاً قابل تألیف اوله ماز .
ثانیاً — مسکرات سبیلله حکومتلر بر طرفدن اکتساب ثروت
ایدیورلر سده دیکر طرفدن مسکراتك آچدینی رخنه لری قاپاتمق ،
وجوده کتیردیکی فلا کتلیری قالدیرمق ایچون میلیونلرجه مبالغ صرفه
مجبور اولورلر . شو حالده مسکرات سبیلله حصوله کلن مصارفاته
او یوزدن حاصل اولان واردات تقابل ایده مز . آوروپاده طوتیلان
ایستایستیکلر بومدعامنری اثباته کافی در .

ثالثاً — بانغیبلر ایله میخانه و فابریقه جیلرک و حکومتک مسکرات

بوزندن. اگتساب ایتمش اولدقلری ثروت ایله افراد ملندن ایچکی استعمال ایدنلرک مسکراته و بویوزدن تولدایلین خسته لقلره، تداوی به، جنحه و جنایت و فلاکتلره، مصارف محاکمه به، دعوی و کیلرینه صرف ایلدکلری ثروت مقایسه ایدیلرسه یوزده بر نسبتنده وارداته مقابل طقسان طقوز نسبتنده استهلاکات و مصارفات یایلمش اولدینی تظاهر ایدر.

رده مسکراتک حکومت بودجه سنه تأمین ایلدیکی وارداته اجانب طرفندن مملکت مزه ادخال ایدیلن مسکراته صرف اولنان مبالغت مقداری مقایسه ایدیه جک اولورسه هر سنه ثروت ملیه مزدن عظیم ومدهش بر یگونک اجانب ثروتنه انضمام ایتمکده اولدینی کورولورکه بوکانبسته حکومتک استفاده سی صفره منجر اولور. بناء علیه معروضات سالفه ایله مسکراتک اقتصاداً فائده سی دکل، عظیم ومدهش ضرری اولدینی صورت قطعیه ده ثبوت بولمش اولور.

انسانلر ممنوع اولان شیلره حریص اولدقلری ایچون منع مسکرات قانون آنلری ایچکیدن و از کچیره مز، کیزی و قاجیلق صورتیله دهها فضله استعمال اولتورننه کیم وقوعات تاریخیه بوکا شاهددر. شو حالده منع مسکرات، قانون ایله دکل، تربیه و تصفیة اخلاق ایله تأمین ایدلملیدر دینلره جواب اولمق اوزره دیرزکه: اولاً — (انسانلر منع اولدقلری شیلره حریصدر. ممنوع اولان شیلری خفی و قاجیلق صورتیله اجرا ایدرلر) سوزلری نظردقته آله جق اولورسه حکومتلر قانوناً هیچ بر شیشی منع ایتمه مک اقتضای ایدردی. چونکه ممنوعات قانونیه مک هپسنده عین علت موجوددر مثلاً: شقاوته، خرسزلغه، هتک عرضه، قتل نفسه، اخلال آسایشه بعض انسانلر فطرة حریص اولدقلری، قانوناً منع اولنسه لر بیله بیهمه حال جرائم مذکورده مرتکبلری

بولته جفی نظر اعتباره آله جق ولورسه بو جرملرک وقوعه کلکسفی
منع ایچون قوانین یاییلمه مق وبولرد دائر یا بلش اولان قوانین موضوعه
الغا ایدلمک لازم کلیردی . بولتروم وبونظریات ایسه وظائف حکومتک
معطل ، آسایش عمومی نک مختل ، جان ، مال ، عرض ، ناموسدن
امنیتهک مقسلب اولسفی اقتضا ایده جکی جهتله باطل و مردوددر .

اساساً خلقک ممنوعاتی ارتکاب ایتک احتمالی بولنمسه یدی قوانین
وضعنه ، حکومت تأسیسنه حاجت قالمازدی . بناءً علیه خلقک آرزو
وتمایلاتی هر نه اولورسه اولسون مصالح ناسی اخلال ، کرک فردی
و کرک اجتماعی سعادت عبادی افساد ایلین جرائمی منع ایچون قانونلر وضع
ایدوب بلا اهمال ولامساحه سیاناً تطبیق ایتک حکومتلرک وظائف
اساسیه لری جمله سننددر .

ثانیاً — واقعا تربیه دینیّه ، تصفیّه اخلاق افراد بشریه نک مناهیدن
اجتناب لری ایچون باشلیجه یر طریق اوله بیلیر سده فطرت بشریه ده
مرکوز اولان قوه غضبیه ایله قوه شهویه بی هر فرودده حد اعتداله
کتیروب دائماً بو وضعیتده بولندیرمه نک امکانی اولمدیغندن هر فردک
اخلاقی تصفیّه ممکن اوله مازکه یالکز بو واسطه ایله عموم افراد بشریه
مناهیدن اجتناب ایده بیله جک برحاله کتیر یله بیلسون . اوت : فضائل
اخلاقیه ایله متصف اولانلر مسکرات و سائر مضر شیلردن اجتناب
ایتمش و ایدیورلر . فقط بونتیایج یالکز آنلره منحصر قالیر .

فضائل اخلاقیه دن محروم بولنان افراد بشریه دن اکثریت عظیمه نک
مناهیدن ، مضر شیلردن اجتناب ایتدیرملری ایسه وسائط ماده
وقوانین وضع وتطبیق ایتکله ممکن اوله بیلیر . بناءً علیه دیانت جلیله
اسلامیه عموم افراد بشریه بی یالکز تصفیّه اخلاق و وسائط معنویه
ایله اصلاح ایتمه نک امکانی وقوعیسی بولندیغندن زواج و وسائط

مادیه دخی وضع ایدوب بو و امثالی دنیا ایشلرینه عاند اولان احکام دینه نك تطبیق و اجراسیله اولیای اموری مکلف قیلمشدر. بو خصوصه دائر وظائف دینه لرینی حسن ایفا ایتمیانلر نزد صمدانی ده مسئول اولوب عقوبت و عذاب الہی به مستحق اولورلر

ثالثاً — مسکراتک منع ایدلمه مسی مملکتده فنا لک توسع و تعمینه، عکسی ایسه آزالسنه باعث اولور. زیرا افعال عباد اراده به منتهی، اراده آرزویه تابع در، ارزو خواطر دن نشات ایدر. بر فردہ و بر جماعته انی و یافنا تربیه و یرلمک ایچون مطلوب اولان جهتہ دائر انلرده آرزو او یاندره جق و اراده به حاکم اوله جق خواطر حصوله کتیرلمک لازمدر. شو حالده مملکتک هر سمتده، هر محله سنده میخانه لر، کارخانه لر آچیلماق، خلقی جلب ایچون اعلانلر یا ییلمق صورتلریله مسکرات و فحشیاته سربستی و یرلمسی ارتکاب مناهی به جاذبه دار سوائق اولمقله برابر بو خصوصه مشکلاته معروض قالمق احتمالی ده بولنمیدیندن شهوت پرست و هوسات نفسانیه لرینه تابع کیمسه لک و بالخاصه کینچلرک قلبلری اوجهنلره منجذب اولوب قالیر. بو انجذاب ایسه آرزوی، آرزو اراده بی تولید، اراده بدنی تحریک ایدرک افعال منیه ارتکاب اولور. حالبوکه افعال منیه ارتکابنک تکرری نفوس بشریه ده ملکات نفسانیه نك حصوله باعث و سبب اولور، ملکات نفسانیه نك حصولی ایسه بونکله اتصاف ایدن انسانلرک قولایلقله و مستمرا او جنس دن سیئات و مناهی ارتکابلری ایچون اسباب مجبره و سوائق قویه اولورکه بعدما آندن و از کچملری کسب صعوبت ایدر، مملکتده ارتکاب قبیای ایدن اخلاق سز کرومی چوغالیر. بونلرک یکانه سائق و سببی ایسه مناهی و قبیای یولنی آچق و بو خصوصه سربستی و یرلمسی و یرمکدر.

بالعکس سربستی و یرلمیوب ده فحش و مسکرات کبی مناهی قبولری

سد و بند او ثورسه و بوندن حصوله کله جک مضر تلمی دفع و رفع ایچون
 دین جلیل اسلامک وضع ایتمش اولدینی حدود و تعزیرات شرعیه
 و یا مدنی ملاندرده وضع اولسان قوانین مدنیه تماماً تطبیق و اجرا
 ایدیلیرسه مسلمانلر آره سنده مسکرات و فحش کبی منہیات اصلا
 تعمم و توسع ایدیه من بلکہ یوزده طقسان طقوز نسبتنده تناقص ایلر .

آرتق معروضات ساغنه ایله دنیوی ، اخروی ، صحی ، عقلی ،
 اخلاقی ، اقتصادی ، عائلهوی ، اجتماعی غیر قابل تلافی بونجه مضرت
 و مفسد تلمی کمال وضوحله کشف و ایضاح اولندقدنصرکه ارباب عقولدن
 اولانلر ایچون (فهل اتم مفهون = حالامی مسکراتدن واز
 کچمیه جکسیکیز) نظم جلیلنک مفاد طالیسنه ، بوکا ایمانی اولیانلرده
 عقل ایله طبک حکم و قرارینه امتثالاً درحال مسکراتدن اجتناب
 ایتک لازمکلیر . زیرا باعث مضرت اولان شیلردن صاقینمق عقل سلیم
 مقتضیاتنددر . آنک ایچون شاعر [وَأَتْرُكُ الْحَمْرَةَ إِنْ كُنْتُ فِيَّ

كَيْفَ يَسْمِي فِي جُنُونٍ مِّنْ عَقْلٍ = حقیقه بر مرد انسان ایسهک
 مسکراتی ترک ایت ، عقل سلیمه مالک اولان کیمسه نصل اولورده
 باعث جنون اولان مسکراته میل و رغبت ایدیه بیلیر) بیتله بو حقیقتی
 بلیغ بر صورتده افاده ایتمشدر .

بناء علیه نه شرعی ، نه عقلی ، نه صحی ، نه اقتصادی ، نه ده فردی
 و اجتماعی ، حقیقی هیچ بر اساسه ، هیچ برسندده ، هیچ بر دلیلله استناد
 ایتکسزین مجرد سریع الزوال بر ذوق بهیمی ایفا ایتک مقصدیله منع
 مسکراته علمهدار اولان سرخوش گروهی قدر وادی ضلالت و اضلاله
 سقوط ایتمش کیمسه لر تصور اولنه ماز .

(أُولَئِكَ كَالْأَنْعَامِ بَلْ هُمْ أَضَلُّ) نظم جلیلی مقتضای طالیسنجه

بوفکر مفسدته صابانلر انسانلق خصائصندن محروم اولوب بهیمیه تردی وانهماک ایتمکده حیوانلر کبی ، بلکه دها شاشقیندرلر .

خمرک احکامی

دین جلیل اسلام خمر حقنده بری اعتقادیاته ، دیگرى عملیاته طابذ اولوق اوزره ایکی نوع احکام وضع ایتمشدر .

دلایل قطعیه قرآنیه ایله ثابت اولان هر حکم قطعی شرعی یی جزما اعتقاد و قبول ایتمکه هر مسلم و مسلمه مکلفدر . خمرک حرمتی ده نهی قطعی قرآنی ایله ثابت اولدینی جهته حرام اولدینی اعتقاد ایتمک هر کسه فرض عیندر . بناء علیه حرمتی انکار ایله حلال اولدیغنه قائل اولوق کفرودین مین اسلامک خطوط اساسیه سی دائره سندن خروجدر . عملیاته متعلق اولان احکامی بش نوعدر :

(۱) خمر حرام لغیه یعنی حرمتی عین وذاتندن ایچوندر . یوقسه اسکار علتندن ایچون دکلدر . بناء علیه چوغی ، آزی ، حتی قطره سی ، ذره سی حرامدر .

(۲) بول ، قان کبی خمرده شرعاً نجاست غلیظه و سردردر . زیرا قرآن کریمده اکا (وجس) تسمیه اولنمشدر که عین وذاتی حرام اولان شی دیمکدر . بناء علیه درهم شرعی مقدارندن فضله سی اوزرنده بولنان کیمسه نك نمازی جائز اولماز . فقهای کرامدن ابن عابدینک بیان ایلدیکی اوزره امام محمد کوره : جوعی سکر ویرن هر نوع مسکر مایمک آزی حتی قطره سی ، ذره سی هم حرام وهم نجسدر .

(۳) مسلم حقنده مال مقوم دکلدر یعنی آنکله انتفاع شرعاً غیر جائزدر . بناء علیه بر مسلمک شرابی تلف ویا غصب ایلین کیمسه به ضمان لازمکلمز .

(۴) چوق ویا آزمقدارده ایچن کیمسه یه سرخوش اولسه بیله حد شرعی اورولمق لازمکلیر . خردن بشقه مسکراتده ایسه سرخوش اولماقجه حد لارمکلمز .

(۵) تمليك، تملكی، بیع و شراسی و اعمالی حرامدر . زیرا رسول اکرم افندمن (إِنَّ الَّذِي حَرَّمَ شُرْبَهَا حَرَّمَ بَيْعَهَا وَ أَكْلَ ثَمْنِهَا =) خمرک ایچلمسنی حرام قبلن الله آنک صایلمسیله پاره سنی ده حرام قلمشدر (ابن عابدین) حدیث شریفیه مسکراتک بیع و شرانک حرمتنی بیان بیورمشدر . محدثین کرامدر امام ترمذ ایله ابن ماجه حضرت آنک روایت ایلدکلری

(لَمَنْ رَسُولُ اللَّهِ صَلَّى اللَّهُ عَلَيْهِ وَسَلَّمَ فِي أَحْتَرِ عَشْرَةَ عَاصِرُهَا وَمُعْتَصِرُهَا وَشَارِبُهَا وَخَامِلُهَا وَالْمَحْمُولَةُ إِلَيْهِ وَسَاقِهَا وَبَائِعُهَا وَآكِلُ ثَمْنِهَا وَالْمُشْتَرِي لَهَا وَالْمُشْتَرِي لَهُ = رسول اکرم صلی الله علیه وسلم افندمن خمر یا بق قصدیله اوزوم صیقان ، صیقدرتان یعنی خمر اعمال ایدن ، اعمال ایتدیرتن ، ایچن ، ایچمک قصدیله کتیرن ، کتیرتن ، ایچیرتن ، صاتان ، پاره سنی ییین ، صاتین آلان ، صاتین آلدیرتن دن عبارت اولان اون کیمسه یه لعنت ایتمشدر [مشکاة المصابیح)

بو حدیث شریفله ده رسول معظم صلی الله علیه وسلم افندمن خمر و مسکرات حقنده اون کیمسه یه لعنت ایتمشدر که بونلر میاننده بیع و شرا ایدنلر ایله اعمال ایدن و ایتدیرتن و مساعده ایدن و مادونیت ویره نده داخلدر .

مسلم شریفده روایت اولندیغی اوزره : برجماعت ، خمرک بیع ، شرا و تجارتندن ابن عباسه سؤال ایتشلر ، ابن عباس حضرت تلمری (اَمْسَلُونَ اَنْتُمْ = سز مسلم دکلیسیکمز) دیمش . (اوت مسلمز)

دیمشله عبدالله بن عباس حضرت تلمری (فَاِنَّهُ لَا يَصْلُحُ بَيْعُهَا وَلَا شَرَاءُهَا)

وَلَا التَّجَارَةُ فِيهَا = اویله ایسه خمرک بیعی، شرابی، تجارتی مسلمانلر ایچون لایق و جائز اولماز (بیورمشلردر .

خمر ایله تداوی یه کلتجه : مذهب معتمد کوره خمر وامشالی حرام شیلر ایله تداوی جائز دکلدر . زیرا رسول اکرم افندمن **إِنَّ اللَّهَ لَمْ يَجْعَلْ شِفَاءَكُمْ فِيهَا حَرَّمَ عَلَيْكُمْ** = الله تعالی حضرتلری حرام ایلدیکی شیلرده سزک ایچون شفا قیلمدی . (عینی)

حدیث شریفله حرام شیلر ایله تداوی جائز اولمادیغنی بیان بیورمشدر . لکن کتب معتبره فقیهه دن (نصاب الاحتساب) نام کتابده بیان اولندیغنه کوره : کندیسنده شفا اولدیغنی یقیناً بیانمدکجه خمر ایله ویا بشقه حرام شیلر ایله تداوی جائز دکلدر . کندیسنده شفا اولدیغنی یقیناً بیلندیکی حالدده آندنبشقه بر علاج ایله او دردی تداوی امکانی بولنورسه ینه آنلر ایله تداوی جائز اولماز . زیرا ضرورت تحقق ایتمه مش دیمکدر . لکن آنده شفا بولندیغنی یقیناً معلوم اولوبده او دردک آندن بشقه علاجی بولنماز ایسه ضرورت تحقق ایتمش اولدیغنی ایچون خمر وامشالی حرام شیلر ایله تداوی جائز اولور . کتب فقیه دن (نهایته) ده بیان اولندیغنه کوره : طیب مسلم حاذق طرفندن شفالی اولدیغنی خبر ویربلوبده اودرده دوا اولمق اوزره مباح برشی بولنماز ایسه حرام ایلهده تداوی جائز اولور .

بوکون بتون ملل متمدنه اطبا سنک رأیبری ده بو مرکزده در . (قطعی بر لزوم طبی اولمادجه مشروبات کتولیه نک قطره سنی دخی ایچمه ملیدر) دیورلر وحقی آمریکا دو قوتورلری (هیچ بر خسته لق ایچون کتول استعمالنده ضرورت یوقدر . هر خسته لق ایچون کتولدن مستغنی قیله جق بردوای مؤثر بولنور) دیورلر .

دو قوتورلرک بورایلرینه وبوکا دائر ویرمش اولدقلری راپوره بناء

آمریقا حکومتی ۲۳ کانون اول ۱۹۲۱ تاریخنده بر قانون وضع ایتشد که آنک موجبجه بیرانک تداوی مقصدیله استعمالی بیله ممنوعدر . امریقایلر دیناً مسکرات استعمالدن ممنوع اولمه دقلری حالدده عقلاً ، تجریمه و فناً اومهلاک آفتک ابنای بشره ایقاع ایلدیکی صحیح ، اخلاقی ، عالمهوی ، اجتماعی پک حیوق ضررلرینه مطلع اولنجه هر واسطه ایله ایچکی علیهنده مجادلهیه باشلادیلر . ملتیرینی اونک ضررندن قورتارمق اوزره قانونلر یابدیلر . اعمالی ، استعمالی ، بیع و شراسنی ، مملکتلرینه ادخالنی کمال شدتله منع ایتدیلر و ایدیورلر ، قات قات ویرکولر آلیورلر ، ایچنلری حبس ایدیورلر .

دین مین اسلامک بشره نافع اولان احکام عالیه سنی تطبیق و اجرا ایله معالیندن مستفید اولیورلر . مسلمانلرک اکثریسی ایسه روابط دینیه و حسیات اسلامیه دن تباعد ایتمش اولمیدرلر که : دین جلیل اسلامک وضع ایتمش اولدینی احکام نافع سنی ، اوامر و نواهی قدسیه سنی نظر امعانه المیهرق مسکرات استعمالیله ، اعمال ، بیع و شراسیله اشتغال ایدیورلر . بو صورتله کرک کندیلرینک ، کرکسه مسلمان قرداشلرینک و بنی نوعلرینک فلاکت و مضرترلرینه ، هیئت اجتماعیه نک ترددی و انحطاطنه بوتون قوتلریله چالیشمش اولیورلر . بو یوزدن مهالک و مفساد متنوعیه دوچار اولارق دنیا ده ایکن فعللرینک جزاسنی کوریورلر ، کوریورلرده بو فلاکت و سفالتلری احکام جلیله دینهلرینه عدم رعایتک نتیجه ضروریه سی اولدیغنی بر درلو حس و ادراک ایده میورلر .

آفیون و اسرارک احکامی

علاوه اولمق اوزره آفیون ، اسرار کبی مضر شیلرک احکام

شرعیہ سنی دہ اجمالاً بیان ایتمک استرم : شرعاً صیانی مطلوب اولان عقل و وجود بشری افساد و تخریب ایلدکلری صحی، اجتماعی، دینی، بک چوق ضررلره باعث اولدکلری ایچون آفیون، اسرار، قوقائین، مورفین، سم، کیمی صلب و جامد اولان بالعموم زهرلری، زهرلی مضر شیلری شریعت غرای محمدیه حرام قیلمش و منع ایتمشدر.

بونلرک سکر و سرسملک ویره جک مقداری شرعاً حرامدر. لیکن نجس دکل، طاهردر. بناءً علیه درهم شرعیدن زیاده سی ایله نماز قیلمق جاثر اولور.

فقهای کرام حضراتی سرسملک ویره جک مقداردن آزینی ادویه

مباحه جمله سندن عد ایتمشدر فقط کیف و ذوق ایچون آز مقدارینی استعمال ایتمک بیله حرامدر. بونلرک حائنه قائل اولانلر مبتدع و زیندیقدر.

ایشته بو کبی مضر شیلرک ضررلرندن افراد بشری قورومق

ایچون دین جلیل اسلام تعزیرات و قوانین جزائییه وضع ایتمش ایکن کرک مسکرات مایعه و کرکسه مسکرات جامده نک مضر تلرینی دفع

ورفع ایچون وضع اولان حدود و تعزیرات شرعییه نک اجرا ایلدلمه سی یوزندن مسلمانلر درلو درلو ضررلره، فلاکتلره دوچار اولمشلر

واولورلر و بین المسلمین بومضر و مهلک شیلر کوندن کونه تعمم و توسع

ایدوب طریبور حالبوکه دهها ایلك ظهورندن اعتباراً دین جاویل

اسلام بشریته بو کبی مضر شیلرک کافه سنی دفعه و قطعی صورتده منع

ایدوب بوسایه ده رچوق انسانلرک حیاتی قورتارمشدر. شوقدرکه

دین مبین اسلامک احکام نافع سنی نفسنده اجرا و تطبیق ایتمیشلر بونعمت

عالیه صمدانیه دن مستفید اولمق شرفندن محروم اولمشلر و اولورلر.

(وما علینا الا البلاغ) (والسلام علی من اتبع الهدا) الحمد لله

علی الاتمام و الصلاة والسلام علی سید الانام و علی آله و اصحابه الکرام.

۲۴ جمادی الاولی ۱۳۴۲ ۱ کانون ثانی ۱۳۴۰

Handwritten text in Arabic script, likely a title or header.

Handwritten text in Arabic script, possibly a subtitle or a line of text.

Handwritten text in Arabic script.

Handwritten text in Arabic script.

Handwritten text in Arabic script.

Handwritten text in Arabic script.

Handwritten text in Arabic script.

Handwritten text in Arabic script.

فیاتی (۱۰) عروشدرد

مؤلفک مسائر آثار مطبوعه سی :

مسآة الاسلام

اسلام یولی

اسلام جیفیری

نظر شریعتده قوۋة بریه وبخبریه

سمین الطابیه

تست شرعی

65763

9

